

Mostar, 24.08.2026. godine

Neovisni predsjednik arbitraže Haris Hakalović, advokat iz Mostara, imenovan Rješenjem Općinskog suda u Mostaru broj 58 0 V 293088 26 V 3 od 01.07.2026. godine, u arbitražnom postupku između Jedinstvenog sindikata državnih službenika i namještenika pravosuđa u Hercegovačko - neretvanskom kantonu i Hercegovačko-neretvanskog kantona, na osnovu člana 5. Zakona o štrajku („Službene novine Federacije BiH“, broj 14/00), nakon održane sjednice arbitraže dana 18.08.2026. godine, donosi

ODLUKU O POSLOVIMA KOJI SE NE MOGU PREKIDATI ZA VRIJEME ŠTRAJKA

I.

Ovom Odlukom, utvrđuju se poslovi koji se ne mogu prekidati za vrijeme štrajka državnih službenika i namještenika zaposlenih u pravosudnim institucijama Hercegovačko - neretvanskog kantona.

II.

Za vrijeme trajanja štrajka u općinskim sudovima u Hercegovačko - neretvanskom kantonu ne mogu se prekidati poslovi koji se odnose na:

1. postupanje u krivičnim predmetima u kojima se odlučuje o određivanju, produženju i ukidanju pritvora, kao i drugim pitanjima neposredno vezanim za trajanje lišenja slobode
2. postupanje u predmetima u kojima su osumnjičene odnosno optužene osobe maloljetnici;
3. postupanje po zahtjevima za izdavanje naredbi za pretresanje i privremeno oduzimanje predmeta;
4. postupanje u predmetima nasilja u porodici i nasilja prema ženama, uključujući odlučivanje o hitnim i zaštitnim mjerama;
5. postupanje u predmetima određivanja mjera osiguranja i privremenih mjera;
6. postupanje u predmetima koji se odnose na izdržavanje maloljetne djece;
7. postupanje u radnim sporovima koji se odnose na prestanak radnog odnosa, kada bi odlaganje postupanja moglo prouzrokovati nenadoknadivu ili naročito tešku štetu za radnika;
8. postupanje u vanparničnim predmetima koji se odnose na zadržavanje duševno bolesnih osoba u zdravstvenoj ustanovi, oduzimanje i vraćanje poslovne sposobnosti, produženje i prestanak roditeljskog prava te oduzimanje i vraćanje roditeljskog prava;
9. hitne presignacije u naprijed navedenim predmetima / postupcima;
10. druge poslove u konkretnim predmetima za koje je zakonom izričito propisana hitnost i čije bi neizvršavanje za vrijeme štrajka moglo dovesti do nastupanja nenadoknadive štete ili teže povrede osnovnih ljudskih prava i sloboda.

Na poslovima prijema, pripreme predmeta za rad i otpreme (pisarnica) u vrijeme štrajka radit će po jedan izvršitelj na predmetima hitne prirode.

Na odjelima krivičnog, parničnog, prekršajnog, vanparničnog i privrednog referata na ročištima / predmetima koji su hitne prirode u vrijeme štrajka radit će asistent / daktilograf koji je raspoređen kod postupajućeg suca.

Na tehničkim poslovima obezbjeđenja nesmetanog rada CMS sistema vezano za predmete hitne prirode u vrijeme štrajka radit će jedan izvršitelj iz IKT odjela.

Poslove kurira (poslovi dostavljanja pismena hitne prirode) u vrijeme štrajka i obavljat će jedan izvršitelj.

Poslove višeg referenta za materijalno - finansijske poslove: obračuna plaće, toplog obroga i prijevoza obavlja jedan izvršitelj.

Poslove pomoćnog radnika za održavanje čistoće koji će obavljati sljedeće poslove: iznošenje otpada i čišćenje toaleta 2 puta sedmično za vrijeme štrajka - obavljat će jedan izvršitelj.

Sud će, kada je to moguće, za obavljanje poslova hitne prirode prvenstveno odrediti državne službenike i namještenike koji nisu članovi Sindikata.

III.

Za vrijeme trajanja štrajka u Kantonalnom sudu u Mostaru ne mogu se prekidati poslovi koji se odnose na:

1. rad na predmetima na krivičnom referatu vezanim za ograničavanje temeljnih ljudskih prava (lišenje slobode odnosno određivanje tj. produženje pritvora);
2. rad na predmetima gdje su osumnjičeni/optuženi maloljetne osobe;
3. rad na predmetima parničnog referata sa privremenim mjerama osiguranja;
4. rad na prekršajnim predmetima u vezi sa zaštitnim mjerama u smislu Zakona o zaštiti od nasilja u obitelji i nasilja prema ženama u FBiH;
5. rad na predmetima upravnog referata gdje je podnesen zahtjev za odlaganje izvršenja osporenog upravnog akta;

Na poslovima prijema, pripreme predmeta za rad i otpreme (pisarnica) u vrijeme štrajka radit će po jedan izvršitelj vezano za predmete hitne prirode.

Na odjelima krivičnog, parničnog, prekršajnog, vanparničnog i privrednog referata na ročištima/predmetima koji su hitne prirode u vrijeme štrajka radit će asistent/daktilograf koji je raspoređen kod postupajućeg suca.

Poslovi kurira obuhvaćaju poslove dostavljanja pismena i dostavnica hitne prirode u vrijeme štrajka i obavljat će ih jedan izvršitelj.

Poslove višeg referenta za materijalno - finansijske poslove: obračuna plaće, toplog obroka i prijevoza obavljat će jedan izvršitelj.

Sud će, kada je to moguće, za obavljanje poslova hitne prirode prvenstveno odrediti državne službenike i namještenike koji nisu članovi Sindikata.

IV.

Za vrijeme trajanja štrajka u Kantonalnom tužilaštvu Hercegovačko neretvanskog kantona ne mogu se prekidati poslovi koji se odnose na:

1. postupanje u pritvorskim predmetima i drugim predmetima u kojima je nekoj osobi oduzeta sloboda;
2. postupanje u predmetima u kojima su maloljetne osobe osumnjičene za izvršenje krivičnog djela ili su oštećene krivičnim djelom;
3. postupanje u predmetima nasilja u porodici i nasilja prema ženama koji zahtijevaju hitno postupanje;
4. poduzimanje istražnih i drugih radnji koje ne trpe odlaganje, naročito podnošenje zahtjeva za izdavanje naredbi za pretresanje i privremeno oduzimanje predmeta, kada bi odlaganje moglo dovesti do gubitka, uništenja, skrivanja ili nemogućnosti naknadnog pribavljanja dokaza;
5. podnošenje pravnih lijekova za koje za vrijeme trajanja štrajka ističe zakonom propisani rok.

Na poslovima prijema, pripreme predmeta za rad i otpreme (pisarnica) u vrijeme štrajka radit će po jedan izvršitelj na predmetima hitne prirode.

Na predmetima koji su hitne prirode u vrijeme štrajka radit će asistent / daktilograf koji je raspoređen kod postupajućeg tužitelja.

Tehničke poslove obezbjeđenja nesmetanog rada CMS sistema iz IKT odjela može obavljati jedan izvršitelj koji nije član sindikata.

Poslove kurira može obavljati jedan izvršitelj koji nije član sindikata.

Poslove pomoćnog radnika za održavanje čistoće koji će obavljati sljedeće poslove: iznošenje otpada i čišćenje toaleta 2 puta sedmično za vrijeme štrajka - obavljat će jedan izvršitelj.

Za obavljanje poslova hitne prirode Tužilaštvo će, kada je to moguće, prvenstveno angažirati zaposlenike koji nisu članovi Sindikata.

V.

Ova odluka stupa na snagu danom donošenja i dostavlja se učesnicima arbitražnog postupka radi postupanja.

Obrazloženje

Rješenjem Općinskog suda u Mostaru broj 58 0 V 293088 26 V 3 od 01.07.2026. godine za neovisnog predsjednika arbitraže u postupku između Jedinstvenog sindikata državnih službenika i namještenika pravosuđa u HNK/Ž i Hercegovačko-neretvanskog kantona/županije imenovan je Haris Hakalović, advokat iz Mostara, radi postizanja sporazuma o poslovima koji se ne mogu prekidati za vrijeme štrajka.

Na sjednici arbitraže održanoj 18.08.2026. godine Sindikat je ostao kod svog prijedloga poslova koji se ne mogu prekidati za vrijeme štrajka, dok je predstavnik Kantonalnog javnog pravobranilaštva HNK izjavio da se ne može očitovati niti raspravljati o prijedlogu tih poslova. Kako sporazum između učesnika nije postignut, konstatirano je da će odluku o poslovima koji se ne mogu prekidati donijeti neovisni predsjednik arbitraže.

Članom 5. Zakona o štrajku propisano je da se poslovima koji se ne mogu prekidati osigurava minimum procesa rada, neophodni uvjeti života i rada, osiguranje imovine te sprečavanje ugrožavanja života, lične sigurnosti i zdravlja stanovništva. Istom odredbom propisano je da se utvrđivanjem tih poslova ne smije onemogućiti ili ograničiti pravo na štrajk te da, ako sporazum ne bude postignut, nastali spor rješava arbitraža.

Pri utvrđivanju minimuma procesa rada neovisni predsjednik arbitraže imao je u vidu, prije svega prijedlog Jedinstvenog sindikata državnih službenika i namještenika pravosuđa u HNK o poslovima koji se ne mogu prekidati za vrijeme štrajka ali i prirodu i ustavnu funkciju pravosudnih institucija, zakonom propisane rokove za postupanje u pojedinim vrstama predmeta, potrebu zaštite života, lične slobode, sigurnosti, kao i potrebu sprečavanja nastupanja nenadoknadivih posljedica uslijed nepostupanja u hitnim predmetima.

Istovremeno je vođeno računa da se krug poslova i broj zaposlenika koji su dužni raditi za vrijeme štrajka ograniči isključivo na ono što je nužno za ostvarivanje navedenih ciljeva, kako se određivanjem minimuma procesa rada ne bi faktički onemogućilo ostvarivanje prava zaposlenika na štrajk.

Slijedom svega navedenog odlučeno je kao u izreci.


Neovisni predsjednik arbitraže
Haris Hakalović, advokat